

D. O. D.

DISSERTATIO ACADEMICA

DE

JURE PRINCIPIS IN SUÆ  
DITIONIS MONASTERIA,

QUAM

CONSENSU AMPL. FACULTATIS PHILOSOPHICÆ  
IN REGIA ACADEMIA ABOËNSI,

PRÆSIDE

*Mag. JOHANNE BILMARK,*

HISTOR. AC PHILOSOPH. PRACT. PROFESSORE  
REG. ET ORD.

PRO SUMMIS IN PHILOSOPHIA HONORIBUS OBTINENDIS,  
PUBLICO EXAMINI MODESTE SUBMITTIT

*SVENO COLLIN,*

OSTROGOTHUS,

IN AUDITORIO MAJORI die VI JUNII  
ANN. R. S. MDCCCLXXXIX.

---

ABOÆ Typis FRENCKELLIANIS.

SÆ RÆ M:TIS  
MAGNÆ FIDEI VIRO,  
REVERENDISSIMO DOMINO,  
*Dn. Mag. JACOBO AXELIO  
LINDBLOM,*

DIOCESEOS LINCOPIENSIS EPISCOPO,  
CONSISTORII ECCLESIASTICI PRÆSIDI,  
NEC NON  
SCHOLARUM PER DIOECESIN EPHORO,

MÆCENTI MAGNO,

*Dissertationem hanc in pignus devotissimi animi sa-  
cram esse voluit.*

REVERENDISSIMI NOMINIS

*'Humillimus cliens,  
SVENO COLLIN.*



## *Præfatio.*

Nemini mortalium ea adhuc contigit felicitas, ut sua cuivis alii placerent facta; quot enim capita, tot fere sensus, plerisque res propositas ex fundamentis plane diversis sèpissime dijudicantibus. Asperum adeo multis est ingenium, ut non contenti, pauperum pulsare tabernas, aut suis molestias creare æqualibus, sed Regum quoque ac Principum, quos amplissima cingit veneracionis gloria, famam & Majestatem arrrodere non verecundentur, atque in eorum instituta censuram sibi permettere rigidam. Quod licet exemplis fere innumeris posset comprobari; unicum tamen hac occasione adduxisse sufficiat. Scilicet vix quempiam, nisi qui in Historia plane hospes sit, fugit, quod annis proxime præterlapsis Principes nonnulli Europæ, præsertim ex Augustissima Domo Austriaca orti, reductionem plurium Monasteriorum, in terris suo imperio ac ditioni subiectis sitorum, instituerint, atque opes, ab antiquissimis retro temporibus in illis congestas, publico vindicaverint ærario. Hanc rerum Ecclesiasticarum innovationem ægerimē tulisse non modo Pontificem Romanum ac Monachorum plerosque, bonis accipiendis quam erogandis paratores, sed alios etjam antiquæ magis superstitioni, quam veræ faventes Religioni, satis docent annales. Quo autem fundamento indignatio eoram nitatur, in hac dis-

fertatiuncula, justam enim argumenti hujus disquisitionem imperata nobis brevitas non permittit, expendemus; sperantes, B. L. meditationes nostras meliorem in partem interpretaturum.

## §. I.

Quamvis Monasteriorum institutionem esse antiquissimam pro comperto habeamus; in eorum tamen non concedimus sententiam, qui illorum originem tempus fundati regni Israëlitici anteverttere statuunt, suæ opinonis præsidium in primis petentes ex Historia filiæ Jephthæ, quippe quam Pater, temerarium soluturus votum, non immolasse, sed ministerio cultus Divini dicatam, monasterio cuidam inclusile arbitrantur; quam vero sententiam, probabili nulla nixam ratione, merito rejiciunt accuratiores antiquitatum Sacrarum Scriptores (*a*). Monasteria vero condendi hæc fuisse videtur ratio: Quum inde a Christianismi exordio Ecclesia plantanda cum variis calamitatibus ac persecutionum tempestatibus iterum iterumque colluctaretur, homines sincera in Deum pietate flagrantes, in deserta se contulerunt loca, ut a furore persecutorum tuli, Divino melius vacare possent cultui. Tantum autem absuit, ut hi Eremitæ quædam sibi exstruerent ædificia, ut sibi gratularentur, si in speluncis & antris, in cryptis ac cavernis montium, preces ac hymnos ad Deum fundere sibi liceret. Ut vero pacatior facta est Ecclesiæ conditio, varias exstruxerunt domos, quas incoluerunt plures, quos idem pro religione animabat zelus. Et sicut prævia constat historia, Christianos Orientales aliquanto prius, quam occidentales, halcyonia diu desiderata obtinuisse; ita eadem nos docet magistra, monasteria in Oriente circa initium, in Occidente autem circa

circa medium seculi IV exstrui coepisse; lice tamen sub judice adhuc pendente, in qua Italæ urbe primum eretum fuerit monasterium (b). Sequentibus seculis numerus Monasteriorum in plerisque Europæ regionibus præter necessitatem & ultra modum, eorum extirpatione pro causa salutis æternæ habita, fuit auctus (c).

(a) Vid: imprimis J. D. *Michaëlis Mosaïsches Recht* Tom. III. p. m. 29 & seq. (b) Vid. L. *Mosheimi Hist. Ecclesiast.* p. m. 168, 169. (c) In sua de St. Geno-veva dissertatione Part. III p. 190 memorie prodit Rev. Doct. G. *Wallin* in sola Gallia an. 1717 non pauciora, quam 14777 fuisse monasteria.

## §. II.

Ex iis, quæ de origine monasteriorum attulimus, qui liber facile perspicit, eadem bonum utique in finem fuisse primum instituta, scilicet ut pii homines, sed a gentilibus gravissime exagitati, locum & occasionem haberent, cultui Divino, pro ea, qua pectus eorum flagrabat pietate, vacandi. Et quamvis hi solitudines securitatis gratia quererent, eorum tamen probitas ita ibidem celari non potuit, quin fama ejus longe lateque evagaretur, pluresque studio eos invisendi, & ex eorum doctrina proficiendi, ad eos alliceret. Successu igitur temporis factum est, ut monasteria non solum essent Oratoria, sed etiam Scholæ Theologicæ, in quibus illi præcipue erudiebantur, qui munus quoddam in Ecclesia desiderabant. Imo quum durante adhuc monasteriorum quasi infantia Cœnobitæ cum pietate beneficentiam conjungerent, non solum juventutem sciendi cupidam & ad se confluentem in disciplinis & artibus instituerunt, sed pauperum quo-

■ ) 4 ( ■

que & ægrotorum sollicitam egerunt curam. Nec diffi-  
culter se in disciplinam Monachorum tunc tradiderunt  
litterarum cultores, cum quod apud eos unica fere esset  
proficiendi occasio, tum quod hi alumni nulla teneren-  
tur lege, ut intra obscura monasteriorum claustra perpe-  
tim manerent, sed in publicam exire possent lucem,  
dum ætas & officium eos hinc evocarent. In laudem  
primorum monasteriorum hoc quoque cedit, quod ipsa  
eruditioñis fuerint gazophylacia; monachorum multis  
partim sollicitate conquirentibus librorum præstantissimo-  
rum exemplaria, quotquot ex gravissimo litteratum nau-  
fragio colligere possent, partim curiose conscribentibus,  
quidquid sua ætate contigisset maxime memorabile. Qui-  
bus omnibus addimus, quod quum barbaris seculis se-  
curitatem vitæ ac bonorum genus valde desideraret hu-  
manum, monasteria adeo sancta fuerint habita, ut fero-  
cissimi etiam homines nefas ducerent eos violare, qui  
in hœ se opportune contulerant asyla; quod quidem  
multis, in anticipi constitutis periculo, magnæ tunc fuit  
saluti.

### §. III.

Accidit autem monasteriis, quod aliis plerisque con-  
tigit institutis humanis, ut primæva eorum integritas diu  
non conservaretur. Sedatis enim persecutionum, quæ  
Ecclesiam adflixerant Christianam, tempestatibus, opibus-  
que monasteriorum insigniter adauctis, pristina mona-  
chorum vitæ ratio penitus fuit mutata, factumque est,  
ut sequioris ævi Cœnobiæ minus de vero Dei cultu  
promovendo, quam de superstitionis favo hominibus,  
ad se institutionis gratia venientibus, propinando essent  
solliciti. Culturam insuper litterarum, ac probam ju-  
ven-

ventutis educandæ curam prorsus negligebant: Quamobrem quum nimiam morum sui ævi corruptionem, ex hac potissimum locordia provenientem, ægre ferret Romanorum Imperator VALENTINIANUS I. an. 370 editum de Scholarum publicarum & monasteriorum reformatione, atque modo in hac observando, edidit, quod licet salutaria multa contineat præcepta, pro temporis tamen illius ratione intento caruit successu. Serpit itaque latius ingravescens malum & monasteria facta sunt tam innocentiae ac virtutum cultoribus exitiosa, quam perditorum ac sceleratorum hominum refugia. Docet insuper Historia, faciem monasteriorem haud lætiorem olim fuisse, quam ergastulorum; quoties enim vel Principem quendam, vel magnorum meritorum Heroem a Republicæ administratione invidi remotum cupierunt æmuli, eum, capite raso, in obscurum quoddam detruserunt monasterium, ex hujus tenebris sine peculiari fortunæ beneficio nequaquam egreslurum. Contra ea dum quis atrocissimum & capitali multitudinem poena commiserat facinus, impunitatem sibi sub præsidio monachorum, quorum omnia habebantur sancta, polliceri potuit: unde apparet pleraque monasteria ita degenerasse, ut securitati publicæ turbandas, quam conservandas aut promovendas essent aptiora.

## §. IV.

His præmissis, dico, monasteria pro depravato eorumdem, qui etiamnum obtinet, statu felicitati civili admodum nocere. Notum enim est, homines in sociates ideo se contulisse, ut consiliis unitis atque conjunctis viribus tam pericula forte ingruentia propulsarent, quam

communem promoverent felicitatem. Nemini itaque ci-  
vium licet decus tatis sedere brachiis, & assas sibi per  
aerem venturas columbas exspectare, sed assiduam quis-  
que pro sua & publica felicitate adhibebit operam. Ur-  
gent quidem Monachi, vim allati argumenti elusuri, se  
graves labores ac pertinaces perferre vigilias, dum Divinum  
nocte ac die procurant cultum; quibus vero respondetur,  
quod nullis vel ex ratione vel ex Revelatione petitis præce-  
ptis possint ostendere, veram pietatem in canora longa-  
rum precum, sape sine mente prolatarum, recitatione con-  
sistere, aut cultum Deo gratum pomposis absolvit cere-  
moniarum ferculis, multo minus se culpa vacare, dum  
tempus, a sacrificis vacuum functionibus, ignaviae ac luxu-  
riæ impendunt. Devota ad Deum iterum iterumque ele-  
vemus corda, nec tamen intermitiamus, facultates ani-  
mæ ac corporis impendere operibus, nobis atque aliis  
profuturis. Imitari debemus exempla Apostolorum, im-  
primis PAULI, quem honoribus fere Divinis prosequun-  
tur omnes, quotquot Hierarchiae subsunt Pontificiae, tem-  
pus, quod a cultu Divino & aliorum in vera religione  
institutione, ipsi supererat, opificio, quod a puerò didice-  
rat, tribuentis, ne cuiquam eslet molestus, sed sibi sup-  
peteret, quo aliorum ejam necessitatibus posset subveni-  
re. Enimvero surdis Monachorum auribus haec narran-  
tur, non perpendentium, quantum ignaviæ eorum exem-  
pla tam ad imminuendam summi Numinis venerationem,  
quam ad cives corrupundos, ut in stadio officiorum,  
sibi & aliis debitorum, se gerant remissiores, faciant. Ni-  
si itaque numerus monachorum ac monasteriorum in  
civitate, in qua largus est utrorumque proventus, a cor-  
dato imminuat Principe, cultura œconomiae & utilium  
artium frigescet, & civitas molestias paupertatis, magis  
magisque ingrayescentis, sentiet. Hinc de Angliae Rege  
Hen-

□ ) 7 ( □

Hentico VIII. Ita scribit *Dn. de Montesquieu*: *Henric VIII voulant reformer l' Eglise d' Angleterre, detruisit les moines, nation paresseuse elle-même, & qui entretenoit la paresse des autres ; parce que pratiquant l' hospitalité, une infinité des gens oisifs, gentils-hommes & bourgeois passoient leur vie à courir de couvent en couvent.* Il ôta encore les hôpitaux, où le bas peuple trouvoit sa subsistance, comme les gentils-hommes trouvoient la leur dans les monastères, *Depuis ce changement l' esprit de commerce & d' industrie s' établit en Angleterre (a).*

---

(a) Vid. *L' Esprit des loix Tom. III. p. m. 45.*

§. V.

Videamus, qua alia adhuc ratione civitati suæ noceant Monachi. Quoties igitur spes commoda quædam obtinendi civibus adfulget, toties in præcipuam eorum partem venire postulant; qui vero immunitatem sibi tam a Jurisdictione civili, quam a tributis, in ærarium conferendis, arrogare solent; quo utroque posteriori modo se a communi civium sorte separant. Dum enim Pontifici Romano in præjudicium sui Principis le totos subjiciunt, libertate, quam imperium admittit civile, non sunt contenti, sed licentiam adfectant, quidvis pro lubitu agendi; satis persvasi, se veniam gravissimorum quorumvis flagitorum, prætensa modo intentionis bonitate, a Patre indulgentiarum haud difficulter impetraturos: quo quidem modo tranquillitatem publicam sæpe turbatam, & optimos Principes furori monachorum haud raro fuisse immolatos, non una docet Historiæ pagina. Et qua, quæfo, fronte immunitatem a tributis exigunt monachi civilibus, non ignari, quod Salvator noster Imperatori

Ro-

Romani censum pro se & suo solverit discipulo? Saluti itaque publicæ ex tenore augusti muneric consilunt Principes, qui monachorum agmina ex suis passim egredi jubent claustris, egressos eisdem, quibus cæteri in universum tenentur cives, adstringunt legibus, monasteria que philanthropicis alijs aliisque consecrant usibus; non nullis tamen eorum, minus scilicet corruptis, intactis, nemagis odio in ipsum ordinem, quam ex publicæ salutis zelo, reductionem illorum suscepisse videantur.

## §. VI.

Quamvis plerique eorum, qui monachale eligunt virte genus, inter cætera voto spontaneæ pauperratis se obstringant; hoc tamen non ita est interpretandum, quod a bonorum ac divitiarum possessione plane abhorreant, sed quod bona accepta non sibi retineant, sed in utilitatem rerum sacrarum, sui præsertim monasterii commodum quisque liberaliter impendat; astute dissimulantes, munera ista, pio concessa animo, suæ gulæ ac saginæ inservitura. Enimvero quum plerique hominum sint bonorum suorum tenaces, varios monachi excogitarunt modos, Juri Naturali & ignotos & adveros, opes sibi ingentes sine ullo acquirendi pretio. Inter alia docuerunt, salutem æternam per bona promererri opera; qua factum est persuasione, ut Laicorum multi hanc, aut huic similem, ultimis suis dispositionibus olim annexerent formulam: *Iste pro requie animæ meæ, & ne post mortem meam in numerum hincorum referar, huic vel illi monasterio tantam pecuniae summam vel tot prædia testamento addico &c.* Ut vero monachi ad beneficentiam commoverent moribundos, commenti sunt *Purgatorium*, in quo homines, commissa expiaturi crimina, horrendos ac diuturnos patenterunt cruciatus, sed qui flamarum vehementiam lar-

gio-

giori beneficiorum, præcipue in monachos & monasteria rore, & legatis ad pias causas possent imminuere. Hinc factum est, ut illi, quos sacra auri fames per totam ferme vitam vexaverat, quum scirent opes suas post mortem sibi inutiles futuras, atque ut tam imminutionem cruciatuum, sua obversantium imaginationi, quam amplas post fata obtinerent laudes, sæpe etiam ut cognatis, optimæ hæreditati inhiantibus, ægre facerent, lautas vulturibus monasteriorum reliquerunt possessiones. Et sicut hac calliditate tenacitatem avarorum vicerunt monachi, ita nec intermisserunt ambitiosorum aucupari munificentiam, qui spe, locum inter sanctos post funera obtinendi & cultum a terra recipiendi posteritate, majorem bonorum & mobilium & immobilium partem magnificis monachorum pollicitationibus seducti, monasteriis, ut rei ficerimæ, legarunt.

### §. VII.

Ut vero hanc bonorum piscationem sibi magis lucrosam redderent monachi, inanem persuasionem, quæ hominum tantum non omnium seculo imprimis decimo viventium, turbaverat animos, dextre foverunt. Scilicet Christiani inde a primo seculo, occasione prædictoris Salvatoris Nostri, quæ Luc. XXI. v. 32 habetur, in eam inciderant opinionem, finem hujus mundi propediem adfuturum; quare quælibet etiam generatio se ultimam esse, in suum induxerat animum. Hoc igitur intuitu nec ægre duxerunt moribundi, opes suas brevi ingruente mundi consummatione conflagraturas, adeoque nec sibi amplius, nec liberis aut cognatis suis usui futuras, monachis, earum avidissimis, & in vicem vitam promittentibus aeternam, concedere. Quam nostram sen-

tentiam confirmant Testamenta, barbaris hisce consignata seculis, in quorum plerisque tale occurrit exordium: *Adventante jam mundi vespera &c. &c.* Atque piis his fraudibus, ut alias silentio prætereamus technas, monasteriorum adeo crevit potentia, ut eadem ipsis Regibus non raro esset formidolosa. Opibus autem in monasteriorum claustris magis magisque quotannis coacervatis, reliquum civitatis corpus plane contabuit, citius serius dissolvendum, nisi medica Principis prudentia fatiscenti tempestive subvenislet.

### §, VIII.

Alio adhuc modo suum commodum non sine iniungi civitatis dispendio Pontifices auxerunt Romani, Clericis, sibi devotis, perpetuum injungentes cœlibatum. Quo magis hoc institutum rationi, Revelationi, praxi in vera Dei Ecclesia receptæ, nec non communi & ardenti hominum tantum non omnium sui similes procreandi inclinationi contrariatur, eo majori opus fuit & artificio & auctoritate, ut huic interdicto, plus quam barbaro, sua Clerici subjicerent colla. Prætendebatur quidem ei singularis sanctitas; oculatores autem fugere non potuit, Pontificum Romanorum eo tendere molimina, ut Clericos obligationi, qua civili tenebantur potestati, subducerent, &, quum nec uxores nec liberos haberent monachi, bona sua monasteriis haud inviti relinquerent. In solarium autem amissorum humanitatis jurium, Pontifices, de filiorum suorum continentia dubitantes, his permiserunt, assumptis frui pellicibus, concubinatum ita honesto præferentes conjugio. Quum vero civitatis robur in numero industriorum ac bonæ frugis incolarum consistat, quales, teste experientia, absque legitimis frustra ex-

exspectantur conjugiis, Principis omnino est officium, ci-  
vies ad primam eandemque Divinam matrimonii institu-  
tionem reducere, nec permettere, ut tot hominum utri-  
usque sexus millia, quot in monasteriis nunc contabe-  
scunt, cœlibem degant vitam, vel ut monachi alienas  
uxores, sub speciolo conscientias earum dirigendi præ-  
textu, ad impudicitiam & spurcissima seducant vitia, ac  
domesticam turbent tranquillitatem.

### §. IX.

Ex hactenus allatis, considerato insimul civitatum fine, satis constare arbitramur, quid de jure Principis ingentem suæ ditionis monasteriorum numerum reducen-  
di, sit sentiendum. Scilicet ex fine civitatis satis intelli-  
gitur, supremam Principi competere potestatem, adeo-  
que eum jure gaudere, ea procurandi omnia, quæ civi-  
um securitati ac felicitati inserviant; eumque hoc jure  
ex æquo uti, si partim removeat ea, quæ saluti publicæ  
sint impedimento, partim ea statuat, quæ hanc re ipsa  
promoveant. Quum itaque monasteria pro prælente e-  
orum, eademque perversa conditione, felicitati publicæ  
plurimis officiant modis, sicut §. § antecedentibus fuit  
ostensum, non indignationem sed pronam civium vene-  
rationem meretur Princeps, qui partim superflua reducit,  
partim residua ita reformat, ut inutilia terræ pondera,  
quæ eadem incolunt, fiant, quæque suo modo & Deo  
grata & suæ patriæ utilia membra. Immo nulli facit in-  
juriam Princeps, si ingentes in monasteriorum cellis co-  
acervatas opes, vel ærugine corrumpendas, vel luxui &  
ignaviæ monachorum tantummodo inservituras, publico  
vindicet æterio, hinc paulo post egressuras, ut suppres-  
sus opulentiaæ publicæ succus nutritius libere moyeatur,

atque ad industrios dimanet cives. Fatemur equidem, opes monasteriorum, ut bona universitatum posse considerari, & earum proinde possessionem a nemine pro arbitrio esse turbandam; re tamen penitus expensa, universitates hæ ita differunt, ut dum in reliquis singuli socii sint domini ratæ totius mastæ portionis, monachi propriæ loquendo nihil habeant proprium, non sibi, sed suis monasteriis, quidquid corradere possunt, acquirentes. Quare nec monachi de damno, sibi a Principe illato, magis conqueri possunt, quam cæteri ægre ferunt cives, si Princeps æquam bonorum amissorum instituat reductionem. Nec sanus quisquam contendat, quod Princeps per monasteriorum suæ ditionis reductionem elonginquo intendat Religionis, in Patria dominantis, immutationem; quum Religionis conditio nec ab ædium magnificientia, nec a supellectilis Ecclesiasticae opulentia dependeat. Denique non diffitemur, quin possessio immemorialis, vi cuius proprietatem bonorum suis Cœnobitæ vindicant monasteriis, in civitate sanctitati possessionum multum saveat, præsertim si postessor in bona versetur fide; at monachi nec naturali, nee civili industria, sed, ut quam parcissime dicamus, piis fraudibus divitias suis compararunt ædibus; quare, quum nec Divinam nec humanum jus do-lo adfistat, Princeps, qui supremam in se solcepit civitatis tutelam, opes, a majoribus civium perverse abalienatas, publico, cui subtractæ fuerunt ului, sine æquitatis læsione revendicare potest.

## §. X.

Concedunt forte illi, qui in præfenti cæteroquin a nobis dissentunt argumento, Principi vi eminentis dominii competere jus, bona tam monasteriorum, quam privato-  
rum

rum, in publicos administrandi usus, hoc autem ad te-  
 norem æquiorum Juris Doctorum, ad casum urgentis  
 necessitatis esse restringendum; qualis quum in reductio-  
 ne monasteriorum, a nostri avi Principibus suscepta  
 non compareat, concludunt, eosdem dominio jam nomi-  
 nato fuisse abusos. Fatemur omnino, Principes dictam in-  
 stituisse reductionem, quamvis nec Hannibal ante portas  
 fulminaret, nec vel caritate annonæ nimia vel insolitis  
 quibusdam adfligerentur calamitatibus, non tamen iniqua  
 est habenda eorum severitas, animadvententium morbum,  
 ex quo civitates eorum laborarent, cum publicis compa-  
 randum malis, & vix aliter, quam reductionis antidoto  
 curandum. Morbi quæris nomen? Dicimus inæqualem  
 nimis bonorum in civitatibus distributionem, ignavis fu-  
 cis majorem, industriis vero civibus minorem opum par-  
 tem possidentibus; ex qua publicam citius ingra-  
 scere calamitatem, necesse fuit. Præterea Principes ne-  
 cessario hoc auctoritatis exemplo saluti publicæ plurimis  
 consulunt modis: ostendunt enim, nullum in terras, suæ  
 ditioni subjectas, Pontifici Romano jus competere, opu-  
 lentiam promovent publicam, immorigeram monacho-  
 rum turbam ad Legum Civilium observantiam adstrin-  
 gunt, atque domesticam tranquillitatem, ab his non pa-  
 rum luxatam, postliminio reducunt. Quibus civitatum  
 cautelis si quis objiciat, pleraque monasteria Pontifici sub-  
 esse Romano, adeoque sine hujus Hierarchæ indultu  
 nec reformanda, nedum reducenda esse; huic in sententia  
 nostræ defensionem respondemus: Pontifici in bona mo-  
 nastriorum non aliud jus competere, quam quod i-  
 pse sibi arrogavit, vel, si quod ex æquo prætendatur,  
 hoc ultra jus dirigendi monachorum vitam & munera  
 non esse extendendum; quare quum jus hoc directionis,  
 ab imperio ac dominio plane diversum, partim neglige-

rent Pontifices, partim in præjudicium Principum eodem abuterentur, hi concessionem iniquo forte tempore sibi vel elicitam, vel extortam refuserunt, civitates suas ad tenorem salutis publicæ, non ad Pontificis Romani arbitrium, componentes.

S. D. G.

